

Na osnovu člana 4.2 Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11) i člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05), na sjednici Državne regulatorne komisije za električnu energiju održanoj 11. maja 2022. godine, donesena je

## **ODLUKA**

### **O ODOBRAVANJU PLANA INVESTICIJA ELEKTROPRIJENOSA BIH ZA 2022. GODINU**

1. Odobrava se Plan investicija Elektroprijenosa Bosne i Hercegovine a.d. Banja Luka za 2022. godinu (u daljnjem tekstu: Plan investicija).  
Vrijednost ukupno odobrenih ulaganja iznosi 329.469.863 KM.
2. Plan investicija sadrži strukturu i dinamiku realizacije planiranih investicija, sa izvorima finansiranja.  
Vrijednost pojedinačnih investicija i jedinične cijene opreme i radova nisu predmet razmatranja Državne regulatorne komisije za električnu energiju (DERK).
3. Plan investicija će se realizirati na transparentan način, prema procedurama definiranim propisima o javnim nabavkama.
4. DERK će pratiti realizaciju Plana investicija, u skladu sa svojim ovlaštenjima.
5. Ova Odluka stupa na snagu danom donošenja, a njen dispozitiv se objavljuje u "Službenom glasniku BiH", službenim glasilima entiteta i Brčko Distrikta BiH.

### ***Obrazloženje***

Upravni odbor Elektroprijenosa Bosne i Hercegovine a.d. Banja Luka, svojom Odlukom broj UO-23-5/2022 od 13. aprila 2022. godine usvojio je Plan investicija Elektroprijenosa BiH za 2022. godinu, koji je dostavljen na odobrenje DERK-u 18. aprila 2022. godine.

Tačkom 3.24 Uvjeta za korištenje licence za djelatnost prijenosa električne energije, normirano je da Elektroprijenos BiH, na osnovu dugoročnog plana razvoja prijenosne mreže, izrađuje godišnji investicioni plan i dostavlja ga DERK-u na odobrenje do kraja novembra za narednu godinu.

Konstatirajući da je Plan investicija dostavljen sa kašnjenjem od pet mjeseci, DERK ističe da je u konkretnom slučaju izostala prethodna izrada i dostava na odobrenje Dugoročnog plana razvoja prijenosne mreže za period 2022. – 2031. godina, kao osnova i okvir za planiranje i realizaciju pojedinačnih investicionih projekata. Dinamika razvoja elektroenergetskog sektora nameće potrebu permanentne analize i godišnje aktuelizacije kriterija za opredjeljivanje strukture investiranja kroz dugoročni plan, kako bi se pojedinačne investicije predviđene investicionim planovima usmjerile i konkretizirale na identificirane prioritete.

Vrijednost ukupno odobrenih ulaganja iznosi 329.469.863 KM i obuhvata planirane investicije na jačanju sistema, stvaranje tehničkih uvjeta u mreži za priključenje novih proizvodnih objekata, izgradnju novih elektroenergetskih objekata, te sanaciju i rekonstrukciju postojećih. Plan investicija sadrži strukturu, dinamiku i izvore finansiranja za sve investicione projekte, što daje dovoljno osnova za njihovu punu realizaciju planiranom dinamikom, bez daljnjeg odlaganja.

DERK nije razmatrao vrijednost pojedinačnih investicija, niti jedinične cijene opreme ili radova koje Plan investicija uključuje, imajući u vidu nestabilnost i globalni trend povećanja cijena sirovina, pojedinačne opreme i radova, ali očekuje njegovu provedbu na transparentan način, u skladu s imperativnim normama koje reguliraju pitanja javnih nabavki u Bosni i Hercegovini.

Polazeći od ranije identificiranih i od DERK-a više puta naglašavanih problema koji utječu na sigurnost snabdijevanja, prevashodno višegodišnji problem previsokih napona u prijenosnoj mreži, DERK, odobravajući dostavljeni dokument, nastoji omogućiti Kompaniji konačno rješavanje navedenog problema, ali i implementaciju drugih projekata od prioritetnog značaja za stabilnost elektroenergetskog sistema Bosne i Hercegovine.

Razmatrajući dostavljeni Plan investicija, DERK je stava da su primarni ciljevi sigurnost snabdijevanja električnom energijom, stvaranje preduvjeta za priključenje novih proizvodnih objekata, odnosno razvoj i optimizacija prijenosne mreže, te da, odobravanjem dostavljenog dokumenta doprinosi i daje potporu Elektroprijenosu BiH u njihovom ostvarivanju. U svjetlu važnosti ovih ciljeva i potrebe realizacije planiranih projekata, DERK očekuje da konačan izbor načina njihovog finansiranja (kreditna ili vlastita sredstva), bude optimalan i ekonomičan.

Dinamičnost razvoja legislative Evropske unije i Energetske zajednice, uz realizirano i očekivano usvajanje novog pravnog okvira u Bosni i Hercegovini, te neophodna potreba stvaranja tehničkih pretpostavki za sigurno snabdijevanje električnom energijom i priključenje novih proizvodnih objekata, uz činjenicu raspoloživosti i operativnosti finansijskih sredstava za planirane investicione projekte, daju dovoljno osnova DERK-u da odobri dostavljeni dokument, očekujući njegovu realizaciju u planiranom okviru.

DERK će pratiti realizaciju projekata koje uključuje Plan investicija i djelovati u skladu sa zakonom definiranim ovlaštenjima.

Broj: 05-28-16-109-2/22

11. maj 2022. godine

Tuzla

Predsjedavajuća Komisije

Branislava Milekić